

يا بحر بعث عليك

ضم الجناح يا بحر و..حن ع العشاق
وارحم بقلب الصبي لوعة جريح مشتاق
من امتي يا بحر كنت تحس تتأثر
لما الحبايب يرجعوك مجروحين بفراق
الكل فاهم سكوتك حزن ع المساكين
بيفكروك في الهنا بتجمّع العاشقين
وانت اللي يا بحر شوفت الغدر وبتسكت
وقت اما رجعوا ل حضنك ويا ناس تانيين
غنوا عشائك ودابو والدموع سائلة
واستنوا منك وفا أو تعدل المائلة
وانت اللي موجك علا ع الشط وبيضحك

بل الهدوم انما ...لسة القلوب شائلة
انا نفسي مرة أفهمك ..ليه نجري ونجيك
نحضن ف موجك أوي .ونغني مواويلك
نضحك علي نفسنا ..انك لنا مداوي
ملحك حرق جرحنا ..واحنا اللي ظالمينك؟
قالوا ان فيك حسنات وبتحفظ الاسرار
وبتكتم الآهات و تحن ع المحتار
وانا ليه بشوف قسوتك والقلب فيك جامد
شاهد علي المجاريح ولا يوم أخذت التار
علي حنة من رملتك .اتجمعوا العاشقين
بنوا م البيوت جنتك وملوها شوق وحنين
موجك علا هدها واتفرقوا الصحبة
صاب الوجع قلبهم ..زرع الضلوع بأنين
الذكريات سرسبت علي شطك المرجان

والصورة صابها النور .. ظهرت ليالي زمان
الروح تسافر لهم ترمي الصباح وتعود
تلقي الحنين طبعهم .. والهجر عمره م كان
أنا جيت أزور مايتك .. واتذكر اللي فات
و كنت من صُحْبَتِكَ .. بحكي لك الحكايات
كان لي حبيب يشبهك في الحزن وجنونك
لما وجعنا الفراق ... انت رضيت بسكات
بعتب عليك واحضنك واعشق سهر ليلك
ولا عمري يوم اكرهك لو دبت من ويلك
فبلاش تموت م الخجل .. واوعدني يوم بالشوق
عاشقة شطوط رملتك ولا احب يوم غيرك !!!